

REGLUGERÐ EVRÓPUÞINGSINS OG RÁÐSINS (ESB) 2016/1013

2017/EES/24/63

frá 8. júní 2016

um breytingu á reglugerð (EB) nr. 184/2005 um hagskýrslugerð Bandalagsins að því er varðar greiðslujöfnuð, þjónustuviðskipti við útlönd og beina, erlenda fjárfestingu (*)

EVROPUÞINGIÐ OG RÁÐ EVRÓPUSAMBANDSINS HAFU,

með hliðsjón af sáttmálanum um starfshætti Evrópusambandsins, einkum 1. mgr. 338. gr.,

með hliðsjón af tillögu framkvæmdastjórnar Evrópusambandsins,

eftir að hafa lagt drög að lagagerð fyrir þjóðþingin,

með hliðsjón af áliti Seðlabanka Evrópu ⁽¹⁾,

í samræmi við almenna lagasetningarmeðferð ⁽²⁾,

og að teknu tilliti til eftirfarandi:

- 1) Vegna gildistöku Lissabonsáttmálans ætti að samræma valdheimildina, sem framkvæmdastjórninni er veitt samkvæmt reglugerð Evrópuþingsins og ráðsins (EB) nr. 184/2005 ⁽³⁾, að 290. og 291. gr. sáttmálans um starfshætti Evrópusambandsins (TFEU).
- 2) Hagskýrslur um greiðslujöfnuð, þjónustuviðskipti við útlönd og beina, erlenda fjárfestingu af háum gæðum og sambærileika eru mikilvægar fyrir þá sem bera ábyrgð á opinberri stefnu í Sambandinu, vísindamenn og alla evrópska borgara. Framkvæmdastjórnin (Hagstofa Evrópusambandsins) ætti að gera allar nauðsynlegar ráðstafanir til að greiða fyrir auðveldum og notendavænum aðgangi að gagnaröðum á Netinu, sem og að láta notendum í té hugsæja framsetningu gagna.
- 3) Evrópskar hagskýrslur um greiðslujöfnuð, þjónustuviðskipti við útlönd og beina, erlenda fjárfestingu eru mjög mikilvægar til að tryggja upplýsta stefnumótun í efnahagsmálum og nákvæma hagspá.
- 4) Framkvæmdastjórnin hefur, í ljósi samþykktar reglugerðar Evrópuþingsins og ráðsins (ESB) nr. 182/2011 ⁽⁴⁾, skuldbindið sig, með yfirlýsingu ⁽⁵⁾, til að endurskoða, í ljósi viðmiðana sem mælt er fyrir um í sáttmálanum um starfshætti Evrópusambandsins, gildandi lagagerðir þar sem í eru tilvísanir í reglunefndarmeðferð með grannskoðun.
- 5) Í reglugerð (EB) nr. 184/2005 er tilvísun í reglunefndarmeðferð með grannskoðun og ætti því að endurskoða hana í ljósi viðmiðananna sem mælt er fyrir um í sáttmálanum um starfshætti Evrópusambandsins.
- 6) Valdið til að samþykkja framseldar gerðir og framkvæmdargerðir ætti, í því skyni að samræma reglugerð (EB) nr. 184/2005 að 290. og 291. gr. sáttmálans um starfshætti Evrópusambandsins, að koma í stað framkvæmdarvalds sem framkvæmdastjórninni er falið samkvæmt þeirri reglugerð.
- 7) Framselja ætti vald til að samþykkja gerðir í samræmi við 290. gr. sáttmálans um starfshætti Evrópusambandsins til framkvæmdastjórnarinnar þegar uppfæra þarf, í kjölfar efnahagslegra eða tæknilegra breytinga, landfræðilega

(*) Þessi EB-gerð birtist í Stjtið. ESB L 171, 29.6.2016, bls. 144. Hennar var getið í ákvörðun sameiginlegu EES-nefndarinnar nr. 44/2017 frá 3. febrúar 2017 um breytingu á XXI. viðauka (Hagskýrslugerð) við EES-samninginn, biður birtingar

(1) Stjtið. ESB C 31, 30.1.2015, bls. 3.

(2) Afstaða Evrópuþingsins frá 10. maí 2016 (hefur enn ekki verið birt í Stjórnartíðindunum) og ákvörðun ráðsins frá 30. maí 2016.

(3) Reglugerð Evrópuþingsins og ráðsins (EB) nr. 184/2005 frá 12. janúar 2005 um hagskýrslur Bandalagsins að því er varðar greiðslujöfnuð, þjónustuviðskipti við útlönd og beina, erlenda fjárfestingu (Stjtið. ESB L 35, 8.2.2005, bls. 23).

(4) Reglugerð Evrópuþingsins og ráðsins (ESB) nr. 182/2011 frá 16. febrúar 2011 um reglur og almennar meginreglur varðandi tilhögun eftirlits aðildarríkjanna með framkvæmdastjórninni þegar hún beitir framkvæmdarvaldi sínu (Stjtið. ESB L 55, 28.2.2011, bls. 13).

(5) Stjtið. ESB L 55, 28.2.2011, bls. 19.

sundurliðun, sundurliðun eftir haggeirum og sundurliðun eftir starfsemi eins og sett er fram í 6., 7. og 8. töflu í I. viðauka við reglugerð (EB) nr. 184/2005, að því tilskildu að slíkar uppfærslur hafi hvorki áhrif á skýrslugjafarbyrði né breyti viðeigandi undirliggjandi hugtakaramma. Einnig ætti að framselja valdið til að samþykkja gerðir í samræmi við 290. gr. sáttmálans um starfshætti Evrópusambandsins til framkvæmdarstjórnarinnar þegar fella þarf niður eða lækka tilteknar kröfur um gagnaflæði í I. viðauka við þá reglugerð, að því tilskildu að slík niðurfelling eða skerðing dragi ekki úr gæðum hagskýrslna sem teknar eru saman í samræmi við þessa reglugerð. Þessar framseldu gerðir ættu einnig að ná yfir framlengingu á skilafresti skýrslunnar um niðurstöður kannana á hagskýrslum um beina, erlenda fjárfestingu sem byggja á hugtakinu um eiginlegt eignarhald og hagskýrslur um beina, erlenda fjárfestingu þar sem greint er á milli beinnar, erlendar fjárfestingar í sprotafyrirtækjum og þeim sem leiða til yfirtöku. Framkvæmdastjórnin ætti að tryggja að þessar framseldu gerðir leggi ekki verulegar viðbótarbyrðar á aðildarríki eða á svareiningarnar og gangi þannig lengra en nauðsynlegt er að því er varðar þessa reglugerð eða breyti viðeigandi undirliggjandi hugtakaramma. Einkar mikilvægt er að framkvæmdastjórnin hafi viðeigandi samráð meðan á undirbúningsvinnu hennar stendur, þ.m.t. við sérfræðinga, og að þetta samráð fari fram í samræmi við meginreglurnar sem mælt er fyrir um í samstarfssamningi milli stofnana frá 13. apríl 2016 um betri lagasetningu ⁽¹⁾. Evrópuþingið og ráðið fá í hendur, einkum í því skyni að tryggja jafna þátttöku við undirbúning framseldra gerða, öll skjöl á sama tíma og sérfræðingar aðildarríkja, og sérfræðingar þeirra hafa kerfisbundið aðgang að fundum sérfræðingahópa framkvæmdastjórnarinnar sem hafa umsjón með undirbúningi framseldra gerða.

- 8) Fela ætti framkvæmdastjórninni framkvæmdarvald með það í huga að samræma tilhögun, uppbyggingu og tíðni gæðaskýrslna í því skyni að tryggja samræmd skilyrði við framkvæmd reglugerðar (EB) nr. 184/2005. Þessu valdi ætti að beita í samræmi við reglugerð (ESB) nr. 182/2011.
- 9) Greiðslujöfnunarnefndin, sem um getur í 11. gr. reglugerðar (EB) nr. 184/2005, hefur veitt framkvæmdastjórninni ráðgjöf og aðstoðað hana við beitingu framkvæmdarvalds hennar. Nefndin um evrópska hagskýrslukerfið (ESSC) sem komið var á fót með reglugerð Evrópuþingsins og ráðsins (EB) nr. 223/2009 ⁽²⁾ ætti, samkvæmt stefnunni um nýtt skipulag um evrópskt hagskýrslukerfi (ESS) sem miðaði að því að bæta samræmingu og samvinnu í þrjú áhrifþætti uppbyggingu innan evrópska hagskýrslukerfisins, að vera í ráðgjafarhlutverki og aðstoða framkvæmdastjórnina við framkvæmdarvald þess. Í því skyni ætti að breyta reglugerð (EB) nr. 184/2005 með því að láta tilvísanir í nefndina um evrópska hagskýrslukerfið koma í stað tilvísana í greiðslujöfnunarnefndina.
- 10) Hið góða rekstrarsamstarf sem nú er á milli seðlabanka aðildarríkjanna og hagstofa aðildarríkjanna, og milli Hagstofu Evrópusambandsins og Evrópska seðlabankans, er ávinningur sem ætti að vernda og þróa frekar með það í huga að bæta heildarsamræmi og gæði þjóðhagslegra hagskýrslna, t.d. hagskýrslna um greiðslujöfnuð, hagskýrslna um fjárhagsmál, hagskýrslna um opinber fjármál og þjóðhagsreikninga. Seðlabankar aðildarríkjanna og hagstofur aðildarríkjanna eiga að halda áfram að taka virkan þátt í undirbúningi allra ákvarðana sem varða greiðslujöfnuð, þjónustuviðskipti við útlönd og hagskýrslur um beinar, erlendar fjárfestingar með þátttöku þeirra í viðeigandi sérfræðingahópum sem bera ábyrgð á greiðslujöfnuði, þjónustuviðskiptum við útlönd og hagskýrslum um beinar, erlendar fjárfestingar. Samstarfið milli evrópska hagskýrslukerfisins og seðlabankakerfis Evrópu (ESCB) er samræmt á skipulagssviði innan evrópska hagskýrsluvettvangsins sem komið var á fót samkvæmt viljayfirlýsingu um samvinnu milli aðila evrópska hagskýrslukerfisins og aðila seðlabankakerfis Evrópu sem var undirrituð 24. apríl 2013.
- 11) Framkvæmastjórnin ætti, í því skyni að styrkja enn frekar samstarfið milli evrópska hagskýrslukerfisins og seðlabankakerfis Evrópu, að biðja um álit hagskýrslunefndar um peningamál, fjármál og greiðslujöfnuð (CMFB) sem skipuð var með ákvörðun ráðsins 2006/856/EB ⁽³⁾, um öll mál sem falla undir valdsvið hennar, eins og getið er um í þeirri ákvörðun.
- 12) Hafa ætti, skv. 4. mgr. 127. gr. og 5. mgr. 282. gr. sáttmála um starfshætti Evrópusambandsins, samráð við seðlabanka aðildarríkjanna um fyrirhugaðar gerðir Sambandsins á sviðum innan valdsviðs þess.
- 13) Aðildarríkin ættu að láta í té gögnin, sem farið er fram á til að taka saman evrópskar hagskýrslur tímanlega, á viðeigandi sniði og af tilskildum gæðum að því er varðar greiðslujöfnuð, þjónustuviðskipti við útlönd og beinar, erlendar fjárfestingar.

⁽¹⁾ Stjtið. ESB L 123, 12.5.2016, bls. 1.

⁽²⁾ Reglugerð Evrópuþingsins og ráðsins (EB) nr. 223/2009 frá 11. mars 2009 um evrópskar hagskýrslur og niðurfellingu reglugerðar Evrópuþingsins og ráðsins (EB, KBE) nr. 1101/2008 um afhendingu gagna sem eru háð trúnaðarkvöðum í hagskýrslum til Hagstofu Evrópubandalaganna, reglugerðar ráðsins (EB) nr. 322/97 um hagskýrslur Bandalagsins og ákvörðunar ráðsins 89/382/EBE, KBE um að koma á fót hagskýrsluáætlunarnefnd Evrópubandalaganna (Stjtið. ESB L 87, 31.3.2009, bls. 164).

⁽³⁾ Ákvörðun ráðsins 2006/856/EB frá 13. nóvember 2006 um að koma á fót hagskýrslunefnd um peningamál, fjármál og greiðslujöfnuð (Stjtið. L 332, 30.11.2006, bls. 21).

- 14) Alþjóðlegt fjármagnsflæði hefur bæði aukist og orðið flóknara frá því að reglugerð (EB) nr. 184/2005 var samþykkt. Aukin notkun á félögum með sérstakan tilgang og lagalegum ráðstöfunum til að finna fjármagnsflæðinu farveg hefur gert eftirlit með slíku flæði erfiðara hvað það varðar að tryggja rekjanleika þeirra og til að forðast tvöfalt eða margfalt bókhald.
- 15) Því ætti að uppfæra reglugerð (EB) nr. 184/2005 í því skyni að bæta gagnsæi og sundurgreinanleika að því er varðar greiðslujöfnuð, þjónustuviðskipti við útlönd og hagskýrslur um beinar, erlendar fjárfestingar.
- 16) Aðildarríki ættu að nota allar viðkomandi og viðeigandi heimildir, þ.m.t. heimildir um stjórnslugögn á borð við fyrirtækjaskrár eða skrá evruhópsins, í því skyni að safna viðeigandi upplýsingum sem krafist er samkvæmt þessari reglugerð. Einnig mætti auka gagnsæi með því að færa sér í nyt nýsköpun á borð við viðurkennt alþjóðlegt auðkenni lögaðila og einnig skrár yfir raunverulegt eignarhald, sem komið var á fót innan ramma tilskipunar Evrópuþingsins og ráðsins (ESB) 2015/849 ⁽¹⁾.
- 17) Í því skyni að þróa hagskýrslur um beinar, erlendar fjárfestingar sem byggðar eru á hugtakinu um eiginlegt eignarhald og hagskýrslur um beinar, erlendar fjárfestingar sem greina á milli beinna, erlendra fjárfestinga í sprotafyrirtækjum og þeim sem leiða til yfirtöku á tilteknu tímabili en leiða ekki almennt til aukningar í fjárfestingu í aðildarríkjunum, ætti að þróa og efla viðeigandi aðferðafræði fyrir þessi svið. Þetta ætti að gera í samvinnu við viðkomandi hagsmunaaðila á borð við Efnahags- og framfarastofnunina, Alþjóðagjaldeyrissjóðinn og ráðstefnu Sameinuðu þjóðanna um viðskipti og þróun.
- 18) Forkannanir ættu að skjóta stoðum undir skilyrðin, þ.m.t. aðferðafræðilegan ramma til að innleiða ný gagnasöfn um árlegar hagskýrslur um beinar, erlendar fjárfestingar og meta kostnað af tengdum gagnasöfnunum, við gæði hagskýrslanna og einnig sambærileika á landsvísu. Niðurstöður þessara kannana ættu að verða viðfangsefni skýrslu sem framkvæmdastjórnin tekur saman og leggur fyrir Evrópuþingið og ráðið.
- 19) Framkvæmdastjórnin ætti að nota viðeigandi heimildir og valdheimildir sem kveðið er á um í 12. gr. reglugerðar (EB) nr. 223/2009 í því skyni að tryggja gæði hagskýrslugagna sem aðildarríkin leggja fram.
- 20) Því ætti að breyta reglugerð (EB) nr. 184/2005 til samræmis við það.

SAMÞYKKT REGLUGERÐ ÞESSA:

1. gr.

Reglugerð (EB) nr. 184/2005 er breytt sem hér segir:

- 1) Eftirfarandi málsgrein bætist við í 2. gr.:

„3. Framkvæmdastjórninni er falið vald til að samþykkja gerðir í samræmi við 10. gr. þegar uppfæra þarf, í kjölfar efnahagslegra eða tæknilegra breytinga, landfræðilega sundurliðun, sundurliðun eftir haggeirum og sundurliðun eftir starfsemi, eins og sett er fram í 6., 7. og 8. töflu I. viðauka, að því tilskildu að slíkar uppfærslur hafi hvorki áhrif á skýrslugjafarbyrði né breyti viðeigandi undirliggjandi hugtakaramma.

Framkvæmdastjórninni er falið vald til að samþykkja gerðir í samræmi við 10. gr. þegar fella þarf niður eða lækka tilteknar kröfur um gagnafleði í I. viðauka, að því tilskildu að slík niðurfelling eða skerðing dragi ekki úr gæðum hagskýrslna sem teknar eru saman í samræmi við þessa reglugerð.

Framkvæmdastjórnin skal tryggja að þessar framseldu gerðir auki ekki álag á aðildarríkin eða svarendurna við framkvæmd þessara valdheimilda.

⁽¹⁾ Tilskipun Evrópuþingsins og ráðsins (ESB) 2015/849 frá 20. maí 2015 um ráðstafanir gegn því að fjármálakerfið sé notað til peningþvættis eða til fjármögnunar hryðjuverkastarfsemi, um breytingu á reglugerð Evrópuþingsins og ráðsins (ESB) nr. 648/2012, og um niðurfellingu á tilskipun Evrópuþingsins og ráðsins 2005/60/EB og tilskipun framkvæmdastjórnarinnar 2006/70/EB (Stjtið. ESB L 141, 5.6.2015, bls. 73).

Framkvæmdastjórnin skal enn fremur rökstyðja aðgerðirnar, sem kveðið er á um í þessum framseldu gerðum þar sem hagkvæmni er athuguð, eftir því sem við á, þ.m.t. fyrirhöfn svarenda og kostnaður við gerðina í samræmi við 3. mgr. 14. gr. reglugerðar Evrópuþingsins og ráðsins (EB) nr. 223/2009 (*).

(*) Reglugerð Evrópuþingsins og ráðsins (EB) nr. 223/2009 frá 11. mars 2009 um evrópskar hagskýrslur og niðurfellingu reglugerðar Evrópuþingsins og ráðsins (EB, KBE) nr. 1101/2008 um afhendingu gagna sem eru háð trúnaðarkvöðum í hagskýrslum, til Hagstofu Evrópubandalaganna, reglugerðar ráðsins (EB) nr. 322/97 um hagskýrslur Bandalagsins og ákvörðunar ráðsins 89/382/EEB, KBE um að koma á fót hagskýrsluáætlunarnefnd Evrópubandalaganna (Stjtið. ESB. L 87, 31.3.2009, bls. 164).“

2) Í stað 4. gr. komi eftirfarandi:

„4. gr.

Gæðaviðmiðanir og -skýrslur

1. Í reglugerð þessari gildir gæðaviðmiðunin, sem greint er frá í 1. mgr. 12. gr. reglugerðar (EB) nr. 223/2009, fyrir öll gögn sem afhenda skal í samræmi við 5. gr. þessarar reglugerðar.

2. Aðildarríkin skulu láta framkvæmdastjórninni (Hagstofu Evrópubandalaganna) í té skýrslu um gæði gagnanna sem er skilað („gæðaskýrslu“).

3. Framkvæmdastjórnin skal, við beitingu þeirra viðmiðana um gæðamat sem um getur í 1. mgr., á gögnin sem þessi reglugerð tekur til, skilgreina tilhögun, uppbyggingu og tíðni gæðaskýrslna með framkvæmdargerðum. Samþykkja skal þessar framkvæmdargerðir í samræmi við rannsóknarmálsmeðferðina sem um getur í 2. mgr. 11. gr.

4. Framkvæmdastjórnin (Hagstofa Evrópusambandsins) skal meta gæði gagnanna sem send hafa verið á grundvelli viðeigandi greiningar á gæðaskýrslunum með hjálp nefndarinnar um evrópska hagskýrslukerfið sem um getur í 1. mgr. 11. gr. og skal taka saman og birta skýrslu um gæði evrópskra hagskýrslna sem falla undir þessa reglugerð. Leggja skal þessa skýrslu fram fyrir Evrópuþingið og ráðið í upplýsingaskyni.

5. Aðildarríkin skulu tilkynna framkvæmdastjórninni (Hagstofu Evrópusambandsins) um meiriháttar breytingar á aðferðafræði eða annars konar breytingar sem gætu haft áhrif á innsend gögn eigi síðar en þremur mánuðum eftir að slíkar breytingar taka gildi. Framkvæmdastjórnin skal tilkynna Evrópuþinginu og öðrum aðildarríkjum um slík samskipti.“

3) Í stað 5. gr. komi eftirfarandi:

„5. gr.

Gagnaflæði

1. Flokka skal hagskýrslurnar sem á að taka saman fyrir sendingu til framkvæmdastjórnarinnar (Hagstofu Evrópusambandsins) samkvæmt gagnaflæði sem eru:

- a) mánaðarlegar tölur um greiðslujöfnuð,
- b) ársfjórðungslegar tölur um greiðslujöfnuð,
- c) þjónustuviðskipti við útlönd,
- d) beint, erlent fjárfestingaflæði,
- e) staða beinnar, erlendar fjárfestingar.

2. Framkvæmdastjórnin (Hagstofa Evrópusambandsins) og aðildarríkin skulu, í samvinnu við viðkomandi alþjóðlega samstarfsaðila, þróa viðeigandi aðferðafræði til að taka saman hagskýrslur um beinar, erlendar fjárfestingar sem byggðar eru á hugtakinu um eiginlegt eignarhald, til viðbótar við meginregluna um nánasta mótaðila og hagskýrslur um beina, erlenda fjárfestingu sem greinir á milli beinnar, erlendar fjárfestingar í sprotafyrirtækjum og þeim sem leiða til yfirtöku.

3. Framkvæmdastjórnin (Hagstofa Evrópusambandsins) skal, eigi síðar en 20. júlí 2018, hrinda af stað frumkönnunum sem aðildarríki munu framkvæma að því er varðar árlegar hagskýrslur um beinar, erlendar fjárfestingar sem byggðar eru á hugtakinu um eiginlegt eignarhald og hagskýrslum um beina, erlenda fjárfestingu sem greinir á milli beinnar, erlendar fjárfestingar í sprotafyrirtækjum og þeim sem leiða til yfirtöku. Tilgangur þessara kannana skal vera sá að setja skilyrði, þ.m.t. aðferðafræðilegan ramma til að innleiða ný gagnasöfn um árlegar hagskýrslur um beinar, erlendar fjárfestingar og meta kostnað af tengdum gagnasöfnum, innbyggðum gæðum hagskýrslanna og einnig sambærileika á landsvísu.

4. Sambandinu er heimilt að veita aðildarríkjunum fjárhagsstuðning í formi styrkja, í samræmi við reglugerð Evrópuþingsins og ráðsins (ESB, KBE) nr. 966/2012 (*), í því skyni að greiða fyrir framkvæmd kannana þeirra sem um getur í 3. mgr.

5. Framkvæmdastjórnin (Hagstofa Evrópusambandsins) skal taka saman skýrslu um niðurstöður kannana þeirra sem um getur í 3. mgr. eigi síðar en 20. júlí 2019. Framsenda skal skýrslu þessa til Evrópuþingsins og ráðsins og, eftir því sem við á, greina eftirstandandi skilyrði sem þarf að uppfylla til að geta þróað aðferðafræðina sem um getur í 2. mgr.

6. Fela skal framkvæmdastjórninni vald til að samþykkja framseldar gerðir í samræmi við 10. gr. í því skyni að lengja skilafrest skýrslunnar sem mælt er fyrir um í 5. mgr. þessarar greinar um 12 mánuði, þegar mat framkvæmdastjórnarinnar á frumkönnuninni, sem um getur í þeirri málsgrein, kveður á um að viðeigandi sé að auðkenna eftirstandandi skilyrði.

Framkvæmdastjórnin skal tryggja að þessar framseldu gerðir auki ekki álag á aðildarríkin eða svarendurna við framkvæmd þessara valdheimilda.

Framkvæmdastjórnin skal enn fremur rökstyðja aðgerðirnar sem kveðið er á um í þessum framseldu gerðum, þar sem, eftir því sem við á, athuga skal hagkvæmni, þ.m.t. fyrirhöfn svarenda og kostnaður við gerðina í samræmi við 3. mgr. 14. gr. reglugerðar (EB) nr. 223/2009.

7. Framkvæmdastjórnin skal, eftir því sem við á og eigi síðar en 12 mánuðum frá útgáfudegi skýrslunnar sem um getur í 5. mgr., koma fram með tillögur þar sem hún byggir einkum á mati framkvæmdastjórnarinnar á niðurstöðum frumkönnunarinnar sem um getur í 3. mgr., um viðbætur við þessa reglugerð í því skyni að skilgreina kröfur um aðferðafræði og gögn fyrir samantekt árlegu hagskýrslanna um beinar, erlendar fjárfestingar um hugtakið eiginlegt eignarhald og hagskýrslum um beina, erlenda fjárfestingu sem greinir á milli beinnar, erlendar fjárfestingar í sprotafyrirtækjum og þeim sem leiða til yfirtöku.

(*) Reglugerð Evrópuþingsins og ráðsins (ESB, KBE) nr. 966/2012 frá 25. október 2012 um fjárhagsreglur sem gilda um fjárlög Sambandsins og um niðurfellingu á reglugerð ráðsins (EB, KBE) nr. 1605/2002 (Stjtið. ESB L 298, 26.10.2012, bls. 1).“

4) Í stað 9. gr. komi eftirfarandi:

„9. gr.

Miðlun

1. Framkvæmdastjórnin (Hagstofa Evrópusambandsins) skal miðla evrópskum hagskýrslum sem teknar eru saman samkvæmt þessari reglugerð með sams konar tíðni og tilgreind er í I. viðauka. Gera skal hagskýrslur þessar tiltækar á vefsetri framkvæmdastjórnarinnar (Hagstofu Evrópusambandsins).

2. Aðildarríki og framkvæmdastjórnin (Hagstofa Evrópusambandsins) skulu sjá um miðlun gagna og lýsigagna sem krafist er í þessari reglugerð í samræmi við 18. gr. reglugerðar (EB) nr. 223/2009 og með fyrirvara um vernd trúnaðarkvaða í hagskýrslum og einnig nákvæmrar aðferðafræði sem notuð var við samantektina.“

5) Í stað 10. gr. komi eftirfarandi:

„10. gr.

Beiting framsals

1. Fela skal framkvæmdastjórninni vald til að samþykkja framseldar gerðir að uppfylltum þeim skilyrðum sem mælt er fyrir um í þessari grein.

2. Fela skal framkvæmdastjórninni vald til að samþykkja framseldar gerðir, sem um getur í 3. mgr. 2. gr. og 6. mgr. 5. gr., í fimm ár frá 19. júlí 2016. Fela skal framkvæmdastjórninni að taka saman skýrslu um valdaframsal eigi síðar en níu mánuðum fyrir lok fimm ára tímabilsins. Framlengja skal valdaframsalið með þegjandi samkomulagi um jafnlangan tíma, nema Evrópuþingið eða ráðið andmæli þeirri framlengingu eigi síðar en þremur mánuðum fyrir lok hvers tímabils.
3. Evrópuþinginu eða ráðinu er hvenær sem er heimilt að afturkalla valdaframsal sem um getur í 3. mgr. 2. gr. og 6. mgr. 5. gr. Með ákvörðun um afturköllun skal bundinn endir á framsal valdsins sem tilgreint er í þeirri ákvörðun. Ákvörðunin öðlast gildi daginn eftir birtingu hennar í *Stjórnartíðindum Evrópusambandsins* eða síðar, eftir því sem tilgreint er í ákvörðuninni. Hún skal ekki hafa áhrif á lögmæti framseldra gerða sem þegar eru í gildi.
4. Framkvæmdastjórnin skal, áður en framseld gerð er samþykkt, hafa samráð við sérfræðinga sem hvert aðildarríki hefur tilnefnt í samræmi við meginreglurnar sem mælt er fyrir um í samstarfssamningi milli stofnana um betri lagasetningu frá 13. apríl 2016 (*).
5. Um leið og framkvæmdastjórnin samþykkir framselda gerð skal hún jafnhliða tilkynna það Evrópuþinginu og ráðinu.
6. Framseld gerð, sem er samþykkt skv. 3. mgr. 2. gr. og 6. mgr. 5. gr., skal því aðeins öðlast gildi að Evrópuþingið eða ráðið hafi ekki haft uppi nein andmæli innan þriggja mánaða frá tilkynningu um gerðina til Evrópuþingsins og ráðsins eða ef bæði Evrópuþingið og ráðið hafa upplýst framkvæmdastjórnina, áður en fresturinn er liðinn, um þá fyrirætlan sína að hreyfa ekki andmælum. Þessi frestur skal framlengdur um þrjá mánuði að frumkvæði Evrópuþingsins eða ráðsins.

(*) Stjtið. ESB L 123, 12.5.2016, bls. 1.“

- 6) Í stað 11. gr. komi eftirfarandi:

„11. gr.

Nefndarmeðferð

1. Framkvæmdastjórnin skal njóta aðstoðar nefndarinnar um evrópska hagskýrslukerfið sem komið var á fót með reglugerð (EB) nr. 223/2009. Sú nefnd skal vera nefnd í skilningi reglugerðar Evrópuþingsins og ráðsins (ESB) nr. 182/2011 (*).
2. Þegar vísað er til þessarar málsgreinar gildir 5. gr. reglugerðar (ESB) nr. 182/2011.

(*) Reglugerð Evrópuþingsins og ráðsins (ESB) nr. 182/2011 frá 16. febrúar 2011 um reglur og almennar meginreglur varðandi tilhögun eftirlits aðildarríkjanna með framkvæmdastjórninni þegar hún beitir framkvæmdarvaldi sínu (Stjtið. ESB L 55, 28.2.2011, bls. 13).“

- 7) Í stað 12. gr. komi eftirfarandi:

„12. gr.

Skýrslur um framkvæmd

Framkvæmdastjórnin skal, eigi síðar en 28. febrúar 2018 og síðan á fimm ára fresti, leggja skýrslu fyrir Evrópuþingið og ráðið um framkvæmd þessarar reglugerðar.

Í þeirri skýrslu skal einkum:

- a) leggja mat á gæði gagna um greiðslujöfnuð, þjónustuviðskipti við útlönd og beinar, erlendar fjárfestingar,
- b) leggja mat á þann ávinning sem Sambandið, aðildarríkin og veitendur og notendur tölfræðilegra upplýsinga hafa af gerð hagskýrslna, miðað við kostnað,

c) greina svið þar sem umbóta og breytinga, sem teljast nauðsynlegar í ljósi fenginna niðurstaðna, kann að vera þörf.“

8) Eftirfarandi grein bætist við:

„12. gr. a

Samstarf við aðrar nefndir

Framkvæmdastjórnin skal, í öllum málum sem falla undir valdsvið hagskýrslunefndar um peningamál, fjármál og greiðslujöfnuð, sem komið var á fót með ákvörðun ráðsins 2006/856/EB (*), krefjast álits þeirrar nefndar í samræmi við ákvæði þeirrar ákvörðunar.

(*) Ákvörðun ráðsins 2006/856/EBE frá 13. nóvember 2006 um að koma á fót hagskýrslunefnd um peningamál, fjármál og greiðslujöfnuð (Stjtið. ESB L 332, 30.11.2006, bls. 21).“

9) Ákvæðum I. viðauka er breytt í samræmi við viðaukann við þessa reglugerð.

2. gr.

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Strassborg 8. júní 2016.

Fyrir Evrópuþingið,
M. SCHULZ
forseti.

Fyrir hönd ráðsins,
A.G. KOENDERS
forseti.

VIÐAUKI

Ákvæðum I. viðauka við reglugerð (EB) nr. 184/2005 er breytt sem hér segir:

- 1) Í stað inngangstexta við töflu 2 komi eftirfarandi:

„Tíðni: Ársfjórðungslega

Fyrsta viðmiðunartímabil: Fyrsti ársfjórðungur ársins 2014

Frestur T+85 frá 2014 til 2016; T+82 frá 2017 ⁽²⁾

⁽²⁾ Umbreytingin til T+82 skal ekki vera lögboðin fyrir aðildarríki sem eru ekki aðilar að Myntbandalaginu.“

- 2) Í töflu 2 í E-hluta, „Staða alþjóðlegra fjárfestinga“, kemur eftirfarandi í stað „Fjármálaafleiður (aðrar en gjaldeyrisvarasjóðir) og forkaupsréttur starfsmanna á hlutabréfum“:

„Fjármálaafleiður (aðrar en gjaldeyrisvarasjóðir) og forkaupsréttur starfsmanna á hlutabréfum	Geo 2 ⁽¹⁾			Geo 2 ⁽¹⁾			Geo 2 ⁽¹⁾ “
Eftir innlendum geirum (geiri 2)							

- 3) Töflu 4.1 er breytt sem hér segir:

- a) Eftirfarandi kemur í stað færslunnar „Beinar fjárfestingar erlendis (DIA) — Viðskipti“:

„Beinar fjárfestingar erlendis (DIA) — Viðskipti	Geo 6	Geo 6 (*)	Geo 6 (*) “
--	-------	------------------	--------------------

- b) Eftirfarandi kemur í stað færslunnar „Beinar fjárfestingar í reikningsskilahagkerfinu (DIRE) — Viðskipti“:

„Beinar fjárfestingar í reikningsskilahagkerfinu (DIRE) — Viðskipti	Geo 6	Geo 6 (*)	Geo 6 (*) “
---	-------	------------------	--------------------

- c) Eftirfarandi neðanmálsgrein bætist við:

„(*) Geo 6: Geo 6 feitletrað, skyldubundið frá og með viðmiðunarárinu 2015.“

- 4) Töflu 4.2 er breytt sem hér segir:

- a) Eftirfarandi kemur í stað færslunnar „Beinar fjárfestingar erlendis (DIA) — Tekjur“:

„Beinar fjárfestingar erlendis (DIA) — Tekjur	Geo 6	Geo 6 (*)	Geo 6 (*) “
---	-------	------------------	--------------------

- b) Eftirfarandi kemur í stað færslunnar „Beinar fjárfestingar í reikningsskilahagkerfinu (DIRE) — Tekjur“:

„Beinar fjárfestingar í reikningsskilahagkerfinu (DIRE) — Tekjur	Geo 6	Geo 6 (*)	Geo 6 (*) “
--	-------	------------------	--------------------

- c) Eftirfarandi neðanmálsgrein bætist við:

„(*) Geo 6: Geo 6 feitletrað, skyldubundið frá og með viðmiðunarárinu 2015.“

- 5) Töflu 5.1 er breytt sem hér segir:

- a) Eftirfarandi kemur í stað færslunnar „Beinar fjárfestingar erlendis (DIA)“:

„Beinar fjárfestingar erlendis (DIA)	Geo 6	Geo 6 (*)	Geo 6 (*) “
--------------------------------------	-------	------------------	--------------------

- b) Eftirfarandi kemur í stað færslunnar „Beinar fjárfestingar í reikningsskilahagkerfinu (DIRE)“:

„Beinar fjárfestingar í reikningsskilahagkerfinu (DIRE)	Geo 6	Geo 6 (*)	Geo 6 (*) “
---	-------	------------------	--------------------

- c) Eftirfarandi neðanmálsgrein bætist við:

„(*) Geo 6: Geo 6 feitletrað, skyldubundið frá og með viðmiðunarárinu 2015.“
